



07156

龍珠山防  
 二卷補遺一  
 卷錄一卷



仁和王同署檢



光緒丙申季六月錢唐丁氏重刊天一閣減本

龍珠山房詩集序

夫士有際遇雲龍以績藻功業抑或有韜晦巖壑以洩  
宣化機要之彼此視雖殊塗而究其研神搃力則一也

故夫詩豈易言哉此所以出諸唇吻者卽擬響于鸞鳳  
布諸管絃者必諧音于律度迺可貴也至如疏譎者或  
求工于片字而反短于終篇掩襲者或暗竊于一句而  
尤昧于全首兼之蕪穢錯陳宮商莫備嗟乎寥寥曠宇  
風雅不於斯而大壞也我明興自正德閒詞人才子挺  
然迭出若何李効其聲于前唐朱揚其波于後雍雍乎  
泯泯乎莫可得而議也卽如一元者亦山林之鴻匠也  
琳琅空谷流衍詞林豈與何李諸君優劣論哉今錢塘

龍珠山房詩集序

一

李君山人少讀書于龍珠山中雖乏雲雷之會而其巖  
巖挺玉則氣可以薄九霄壘壘唾珠則談可以屈四座  
迺葦華蘿飄然恬處常謂予曰標格匪勝何貴于黼黻  
名理苟聞奚棄于側微此誠寰閒之隱秀而邱中之孤  
標也故與海內名流日事諷詠其詩緯體綿密風骨疏  
秀譬諸繁絃急管而清濁相宣翠壑紅巒而煙霞交映  
可謂得騷雅之旨矣使置之孟襄陽之閒則誠伯仲方  
諸秦徵士則胎育矣故凡在襟中交彥恐其爲詩久而  
逸去也迺詮次成篇分爲二卷使泚其氣者若涉明堂  
而探武庫覩其珍者如登玉府而躋瑤臺豈少之哉豈  
少之哉李君名奎字伯文號龍珠山人嘉靖甲子歲季

秋九月吉旦杭郡望陽山人劉子伯撰

龍珠山房詩集序



秋九月吉旦杭郡望陽山人劉子伯撰



龍珠山房詩集卷上

明 錢塘李 奎 著

五言古詩

贈別四首送費少卿

初日出東陸津樹舍朝暉與子未分手中心惜睽違搖  
搖片帆去漠漠沙禽飛願言託沙禽千里送君歸  
君歸楚水陽我在吳山阿吳山與楚水相去路幾何飛  
雁有停翮遊鱗恐沈波願言託魚雁書札無蹉跎

蹉跎歲將晚相見復何時碧草日無色寒霜已滿蹊落  
月不迴照浮雲去難羈願言松桂心無忘巖壑期

龍珠山房集卷上

一

猿嘯空山悲風振林柯握手不忍別長歌淚滂沱

感興四首

浮雲變霖雨白露爲嚴霜衰榮互相感因之悲眾芳寵  
愛易移奪繁華有凋傷不見夷齊子終身卧首陽

幽蘭生澗傍蕭艾雜其叢如何冰雪心白日悲春風寂  
寞楚山晚蕭條湘煙空豈不抱幽獨願言託絲桐但恐  
歲華暮摧殘眾草同

抱朴養吾素學道希神仙廼知洪濛竅祕在天地先日  
月各有道往來成周旋金華耀五內玉液流丹田煉藥  
遁人世逍遙凌紫煙

淒淒屋上霜蕭蕭井邊樹秋風起空林葉落散還聚如

何金石交一旦棄中路不見東流水爲潮復西顧

秋日園中寫懷

梧桐知天秋井上飛黃葉轆轤汲寒泉晝夜聲不徹爲  
園不及畦何以御妻妾寂莫掩衡門著書空滿篋

泛湖登北高峯止宿靈隱寺

沿流遡澄碧勵策登寒峯嵐徑隱蘿篠晴波蕩芙蓉披  
霞越鷺嶺遠近聞禪鐘倦倚澗側石俛視崖上松樵漁  
互來去麋鹿閒相從林紫夕煙重葉紅霜氣濃慕寂憇  
空境孤雲伴行蹤撫景消物慮幽心已沖融

月夜山中訪友不遇

鐘鳴黃葉飛月出地上白閒步踏寒雲來訪山中客空

龍珠山房集卷上

二

林寂無人高泉落危石柴門置不關孤琴留素壁夜山  
何處尋緣苔暗行迹

田家

日落原野明村村暮煙起野老望荆扉行歌負耕耒嗟  
彼形雖勞而無物所累桑麻有餘饒雞豚聊復爾數月  
一裏頭終身老田里貧賤苟自安富貴何足恃

山家

茅屋三四間桃李八九樹流水忽到門田園自成趣主  
人不裹頭相見卻如故掃石坐花閒所談非世務瓦甕  
瀉松醪盤飧出菰芋對酌醉復醒不覺日已暮回首春  
山空白雲滿歸路

同鄰父飲

籬邊菊正華山中酒初熟鄰翁訪我來開尊向茅屋落  
日照枯桑秋風振林木倒著烏角巾長歌紫芝曲醉後  
不復歸還同石牀宿

遊天竺寺憇客兒亭有懷謝康樂

秋光澹巖岫入谷聞晨鐘白雲歇紫岑峯朶開芙蓉林  
香晝自結夾道羅長松沙廣草煙薄蹊深花霧濃梵嶺  
鬱飛鷲咒潭降毒龍閒禽互交語道侶時相從久矣悟  
空寂齋心禮金容精廬隱暮色蔬食修珍供還憇崖亭  
上永懷高人蹤

擬古二首

龍珠山房集卷上

三

紫燕棲高樓雙雙弄春色銜泥未成巢秋風促歸翼居  
高甯久安危言終見疾何如彼鷓鴣一枝常自息  
駕舟涉遠川川廣不可渡飄風從何來洶波阻征路連  
灘起奔雷白日忽爾暮豈無垂堂思而有臨淵懼世道  
慎險夷回舟發深悟

入山

春風試履杖涉彼江上山遊目觸遐景一望心已閒雙  
崖夾鳥度疊巘梯雲攀蘿隈日曖曖水壑風潺潺振衣  
躡芳菜俛視朱華間朱華惜易委白日忽以殘豈若松  
桂隱永此冰雪顏去去恐不深煙霞接人寰

採藥

山中宿雨過嶺上朝霞白荷鋤入南畦藥苗始堪摘黃  
精種未鋤紫芝已盈尺輕風吹薜衣寒雲欲凝屐隔水  
望茅茨還歸煮白石

遠遊

長劍出方外短褐離人寰駕言盡海宇歷遊窮名山五  
嶽探靈秘搜神叩玄關至人恍難遇殷憂夢寐間越冀  
道且長蹉跎詎能還星霜變白髮歲月凋紅顏歸來守  
林壑思釣桐江灣回看若木花可望不可攀

春日入秦亭山

抱琴恣遊觀層崖豁晴霧飛泉掛壁紅遠見綠溪樹日  
出山翠高風吹鳥聲度海嶠負遐情雲霞縱高步眷此  
深壑中採芝可怡慮豈是避秦人桃花笑歸暮

龍珠山房集卷上

四

長安秋夜同四溟謝茂秦集沈參軍宅

槐堂秋氣清坐久涼風發移席向空庭開尊對華月輕  
颿飛玉樓寒光射金闕願言長夜遊伴看銀河沒

獨酌山中

白雲栖空山流水止深澤幽幽蘭桂叢而有歲寒色嗟  
我欲何之反爲形所役放歌入南山解衣坐白石幽花  
發輕條明霞流素壁共此麋鹿遊倦同林鳥息富貴非  
我心杯酒聊自適

羣鳥

哀哀孤飛雁啞啞城上鳥悲鳴各失所俛仰成躊躕燕

雀居文梁鳴彙集高梧雕籠蓄凡禽玉食皆雛雛鳳鳥  
不可見長風吹日徂

七言古詩

同吳山姚子元景山余勵卿西湖舟中作

春半出門春可憐黃鸝隔岸唳春煙爐頭沽酒飲不醉  
更向湖邊呼酒船葡萄綠荔枝紅銀缸金碗須臾空但  
令一醉卧明月莫使醒眼看春風鳳皇山頭春草綠金  
牛湖上花成簇日落歌聲水面來畫欄笑倚人如玉

梅花歌爲春元余思兼先春樓賦

晴霞拂曙春欲來千樹萬樹梅花開東風捲花過樓角  
十里飛香鏡中落不羨孤山處士家幾株寂寞栖寒鴉  
隴頭信遠不可到姑射羅浮安足誇何如山中花發好  
更訝君家得春早庭前玉樹已成花湖上青陽未回草  
青陽玉樹正當時年少曾攀月桂枝惜取樓前千樹實  
調羹好爲入商羹

酬青門山人沈懋學長安見寄

聞君隱燕市醉卧長安春軒冕旣無意閉門何所親嗟  
哉越石父豈是負薪人迢迢越冀三千里思君夢繞滹  
沱水白雁新傳一尺書黃花正發三秋蕊可憐花發不  
同歡可惜花開不共看竹葉愁傾社日酒茱萸空對別  
時灘強將歌笑追明月昔日同遊半淪没方將尋伴赤  
松遊君歸共採稽山蕨

爛柯山樵圖

萬壑秋雲冷千峯一徑遙碧鱗眼中起短髮風蕭蕭偶  
逢石上弈相看竟無語回首暮山空罷樵獨歸去歸去  
人間事已非斧柯蝕盡蒼煙飛胸中猶記最高著不下  
嚴陵舊釣磯

西湖採蓮歌

妾家西湖上門前多綠荷新成採蓮曲試向湖中歌移  
舟近柳塘柳深舟可藏身輕舟不定柳輕風飄揚岸上  
誰家遊冶郎戲將丸彈打鴛鴦雙飛驚入花間去不道  
阿奴郎在傍

閒居行爲姚子元作

龍珠山房集卷上

六

丹山白屋居自安門前千樹青琅玕有書萬卷閒可讀  
日午下牀常不冠問君何如得此樂富貴視之如雲薄  
不將雄賦獻長楊惟事躬耕老邱壑結廬朝夕對松楸  
鹿豕雲霞相共遊放浪何曾入城府笑歌直欲輕王侯  
身著斑斕五花燦北堂慈母松齡算菽水猶勝五鼎陳  
布衣肯以三公換大兒吐氣千青雲年少才華海內聞  
小兒猶能克家業孫枝玉立皆蘭芬君不見龐德公鹿  
門千載遺高風又不見林處士只今尙有梅千樹與君  
共泛西湖船日日湖邊了生事

平倭三捷贈程將軍

寶劍腰間懸轆轤單騎孤旅曾全吳叱咤能令山嶽震

指揮決使江河枯回看海上鯨風起彎弓直射蛟鯢死  
絕島夷酋一怒平流波噴血三千里身馳匹馬向閩中  
甯福妖氛已望風天子若聞三捷奏銅標當鑄伏波功

送徐郎中養親歸三衢

三月桐江路春風花正開遙知明月夜獨上客星臺君  
不見臺高明月懸千古白石磷磷淨堪數自昔高人戀  
薜蘿從來達士輕簪俎出處相看自不同羨君逸氣凌  
秋鴻一朝別卻鵝鸞侶千里歸乘樵渡風去去爭看著  
彩衣三衢山水亦生輝躊躇不盡臨歧意伫目天南雲  
亂飛

贈一天上人

龍珠山房集卷上

七

少年杖錫着袈裟曇葉峯頭遠出家萬善壇中受五戒  
千人會上演三車聞道尋師入雞足東歸挂塔西湖曲  
相逢握手卽論禪呼我前身是金粟春風拂石坐空林  
柳眉花面菩提心自云法本法非法妙相何殊觀世音  
色卽是空空卽色色空空無定迹舌上花開九品蓮  
手中鉢化千家食我本紅塵浪迹人可憐相識未相親  
只今欲究維摩學與爾同超苦海津

遊邊行

居庸關頭秋草黃胡天八月飛寒霜烏鳶逐人邊日慘  
匹馬行馳沙磧長茫茫沙磧無窮已漢戍秦邊幾萬里  
北風捲地起胡塵天驕夜獵單于壘部落分屯黑海雲

笳聲直度黃河水白狼山頭烽火明羽書飛入咸陽城  
咸陽戰士勇如虎援劍攜戈思破虜不道兵家慎守防  
殺聲欲碎轅門鼓北庭都護縱家丁夜半徵兵出井陘  
劫掠千村雞犬盡屠人滿地血沙腥路逢男女相聚哭  
有身甯可遭胡戮白刃之下不敢言畢竟妻奴爲所辱  
君不見嫵姚已死車騎亡九邊極目空悲傷

長安逢歌者

春風三月時花滿長安道越客久不歸愁心亂芳草鳳  
皇城頭風雨過春明門外落花多相逢一曲人如玉皓  
齒紅顏奈爾何

空山引

龍珠山房集卷上

八

白雲去兮青山空黃葉下兮來秋風步明月兮空山中  
懷美人兮江之東望江水兮思無窮

五言律詩上

塞下

塞下胡塵暗邊頭殺氣寒提戈入瀚海飛騎斬樓蘭部  
曲身常賤刀頭血未乾功成歸主將白首望長安

從軍

匹馬向風塵男兒多苦辛感恩懷國士揮淚別鄉人沙  
冷黃龍月雲荒紫塞春平胡知有策助業重麒麟

商婦詞

聞說離三楚書來尙在巴百年能幾日終歲不歸家梁

上雙栖燕池邊並蒂花春風不同老惆悵各天涯

田婦詞

嫁作田家婦何曾試粉妝奩空愁稅逼衣破爲農忙夜  
織分窗月晨春對曉霜貧寒甘自守不敢怨糟糠

芳樹

惜此西園樹含滋春正妍嬌花紅映日暗葉翠凝煙影  
向臨池見香從過蝶傳芳菲君不在零落竟誰憐

梅花落

霜風振玉柯飛花亂瓊雪寒香度重幃離心已成結那  
堪笛裏吹忍向愁中折自傷憔悴顏不改歲寒節

折楊柳

龍珠山房集卷上

九

紫塞三千里金閨二八年含嗁攀弱柳葉葉總堪憐眉  
翠愁同結腰纖懶復眠相思空有曲誰與笛中傳

巫山高

巫山高不極望望欲凌空日落羣峯外猿嗥雜樹中蕭  
條神女廟寂寞楚王宮時見陽臺雨隨雲度峽風

臨高臺

春日臨高處春雲四望開山從海上出河自洛中迴銅  
雀已成草黃金漫築臺故鄉渺何處極眺且銜杯

銅爵妓

朝望西陵樹暮登銅爵臺春風還自恨明月爲誰來花  
其嗁前落雲同夢裏回君王愛歌舞不道妾心摧

京口望江中諸勝

一水分天塹，千峯入建康。西連彭蠡近，東去海門長。洲  
遠迴鸚鵡臺，空憶鳳皇。江山此登眺，幽思滿滄浪。

長安送施引之

驅馬度蘆溝，霜風犯紫裘。壯懷餘楚璧，俠氣有吳鉤。塞  
月天涯夢，江梅筵裏愁。還思請纓者，肯戀故山秋。

夏日訪中庵上人晚歸

避暑過蘭若，松陰轉夕暉。看山忘世慮，見月悟禪機。雙  
樹空中出，孤雲象外飛。獨嗟歸去路，塵土上荷衣。

送友人之楚

江閣敞離筵，送君之郢川。亂山黃葉路，三楚白雲天。竹

龍珠山房集卷上

十

色連秋水，猿聲隔暮煙。相思如有句，衡雁若爲傳。

秋夜訪謝山人茂秦得才字

落葉滿燕臺，因君夜復來。市樓寒月上，苑樹白雲開。春  
草燈前句，黃花客裏杯。自慙巴下調，難和郢中才。

送蘇少司馬巡邊

亞相登壇日，驅兵出塞時。風雲迴羽扇，日月閃牙旗。秋  
氣軍中肅，霜威漠北馳。還輕寶車騎，百戰建功奇。

毗盧閣餞顧四中翰

斜日明朱閣，凭欄酒易曛。風塵嗟滿眼，歧路復離羣。遠  
水平分月，寒山半入雲。鄉關不可望，落葉正紛紛。

送吳山人遊北嶽兼呈蘇少司馬

興高恒嶽去一騎出長安道路仍西轉風塵正北看暮  
雲孤嶺斷春雪雁門寒幕府論兵日還應問鸚冠

送孫東蒙

披雪來東岱乘春復遠遊白雲湖上路明月海邊樓旅  
食馮驩劍生涯季子裘何當拂衣去共爾下滄洲

賦山水清蹤圖贈劉安元

芳草時初歇憐君復遠遊青藜千嶂月白幘五湖秋雲  
外仙人館江邊帝子樓登臨有詞賦處處繫蘭舟

高光州池亭夜宴

林壑遙通市池泉細引湖山花明席綺海月上簾珠菡  
萏開銀燭葡萄泛玉壺能容山簡醉歸有妓爭扶

送王夢白歸吳

龍珠山房集卷上

七

長揖謝知己悠然依薜蘿放歌辭禁月鼓柂下江波倦  
鳥暮還度浮雲秋更多西風鶴橋路歸去有漁蓑

新安道中

江空夕雨晴春日片帆明水擬天邊落舟從石上行野  
煙昏月色異鳥學猿聲不耐沙頭草萋萋亂客情

送吳澈溪分教會稽

季札江南去乘秋試薄遊山雲藏并邑江月近書樓地  
僻臨滄海官閒對白鷗還期探禹穴同與泛扁舟

賦得上苑花氣

上苑饒花氣氤氳曉未開忽隨風散去還逐蝶飛來作

霧凝歌袖分香落酒杯願乘雲五色常遶鳳皇臺

還峯贈宋方伯

天外出芙蓉飛來何處峯落日望不極白雲知幾重風  
迴明遠燒木脫見寒松宋玉昔遊地長歌秋氣濃

送周一之遊岱嶽

岱嶽探奇去高秋壯此行雲空見海色風遠度松聲山  
水饒詩思煙霞薄宦情遙知登日觀俯檻聽雞鳴

春日病起寄包庸之

門柳已垂絲春來總未知不同尊酒興猶負看花期海  
闊書來遠山寒病起遲江梅開欲盡何以寄相思

夜泊

龍珠山房集卷上

十一

月白三秋夜雲空萬里天客舟臨野渡旅食傍墟煙露  
冷迴蘆雁風寒咽柳蟬百年今已半猶自涉山川

明妃

結束辭金殿含嗁入虜羣琵琶懸漢月宮髻挽胡雲草  
白春難辨沙黃路不分回頭望關塞誰是霍將軍

送郁司訓之桃源

仙舟清曉發吏隱向桃源樹色連淮甸潮聲近海門著  
書仍閉閣好客幾開尊別後多詞賦還應達帝闈

長安春日送周用之還錢塘

陌上楊花起天涯旅思多柔條不忍折遠道復如何晴  
日亂黃鳥春雲低綠波西湖獨歸去誰與聽笙歌

登任城太白酒樓

曲檻憑臨處春城暝色初川長一水渺日落四山孤樓  
上青尊歛沙邊碧草餘浮雲不可望何處弔騎魚

送方山人南遊兼寄謝茂秦

雲迹憐無定飄飄何所之幾時歸白社對月倒青卮十  
載猶懷刺千山獨杖藜西園逢謝老爲我寄相思

秋思

萬里狼煙接三秋殺氣橫愁雲依漢壘孤月墮燕城斷  
雁乘寒度哀笳入夜鳴不知雙闕下誰爲請長纓

春日山中懷沈懋學

南遊嗟未返獨步惜離羣入谷聞黃鳥昇崖見白雲深

龍珠山房集卷上

三

愁亂草色幽思遶蘭芬寂寂空山裏那能不憶君

遊金華山

谷口尋仙窟雲中度石梁亂山新雨霽滿路落花香野  
寺依流水孤村背夕陽初平倘相遇一笑共驅羊

送童侍御謫嶺南

故人復此別尊酒駐斜暉星斗看龍劍風霜惜豸衣湖  
邊生事在嶺外宦情微欲共牽芳杜三春嗟未歸

舟中焚香

燃藜開寶鴨分火試龍涎夜氣碧於水秋雲白罩船洲  
轉疑聞杜波迴若近蓮曉風吹不散猶結一溪煙

舟中七夕

江上繫蘭舟天邊望女牛雲空烏鵲渡風冷白蘋洲寂  
寂穿鍼夜蕭蕭落葉秋思家未有夢何處說離愁

秋雲訪岫樓山人李用晦

峯頭雲氣紫門外石泉寒結屋同僧住栽花與客看衣  
尋蘿薜製食採柏松餐卻笑余多累未能離釣竿

劉安元吳興課租

秋風吹霽水九月稻初成滿地菊萸發入門雞犬迎長  
歌斗酒盡短褐一琴橫爲戀吳山好留家半住城

客中聞篴

何人吹玉篴滿地起秋風月下嘒嫠婦沙邊泣斷鴻九  
秋寒葉墮萬里塞雲空聽徹關山遠愁生兩鬢中

龍珠山房集卷上

十四

夏日過淞江東陸茂才

浪遊忘毒暑五月渡吳淞草沒沙邊路雲添江上峯波  
光迷蜀玉花氣瘴芙蓉何處堪維棹雲間有土龍

漫興

興來披短髮吹篴向清秋海澗雲爲岸山空石作樓煙  
霞隨杖屨猿鶴共林邱載酒呼漁父中流一放舟

金華山中尋道者不遇

白玉仙人洞青山隱士家泉飛千澗雪桃燦一林霞徑  
寂雲偏杳峯迴日易斜不知深壑裏何處煉丹砂

病起偶成

松影亂虛閣冷雲侵薜衣病知身是幻老覺事全非山

靜桂初發月明烏正飛野情何處適夜起坐漁磯

巳日同謝山人馬中翰周御藥郭中翰沈參軍集

昭應山亭限韻

玉洞穿雲入瑤琴對水彈清遊無俗侶高興有閒官山  
近雪初霽花遲春尙寒蘭亭復何在幽思遶林端

歲暮送林介山避寇歸天台

送君臨臘盡風色正蕭條宦迹隨雲嬾鄉心逐水遙行  
途兼夜月歸棹趁寒潮亂後村煙改逢人問石橋

送潯南山人方困學

落日放舟去長風吹薛衣煙中秋水闊雲外暮山微茶  
塢開詩社茗溪隱釣磯幽期定何日重爲啟柴扉

龍珠山房集卷上

五

曉過靈隱澗西僧房

曉日明紺宇晨鐘出翠微空林獨影過幽境亂花飛鳥  
入煙中樹僧開竹裏扉不須重問法心已久忘機

吳山瑞蕉池上餞徐龍川

霞館淨無塵青山對故人馮唐今未老鮑叔久知貧霜  
落池邊葉潮平江上津扁舟別離去愁思欲沾巾

積雨寄劉安元

寂寂掩衡門空庭煙霧生連宵虛月色滿枕是溪聲夜  
雨憐同病春田廢耦耕可堪花又落何以慰離情

送僧覺性西遊

杖錫三秋別崑崙幾萬程孤雲身有伴片月性常明苦

海尋蘆渡靈山踏雪行西歸應有偈重爲說無生

同汪汝鳴泛震澤

載酒同佳客乘舟泛夕曛蒼茫太湖水合沓洞庭雲秋

晚蒹葭闕霜寒木葉分自憐疏放意不愧野鷗羣

自餘早春寄施引之

海上功成日山中酒熟時客來留一醉興到卽成詩花

豔經春早雲寒出戶遲東風吹細柳門外擁旌旗

韻原送沈懋學遊閩

山中方寂寞歲晚復何之歧路雲千里梅花雪滿枝孤  
蓬入島嶼寒雁落江籬只此煩書札因之慰遠思

凍柳未成絲那堪贈別離雪殘閩岫出江冷越帆遲綠

龍珠山房集卷上

六

酒隨中散瑤琴待子期所經皆舊識隨處有新詩

遊安樂寺

隔水聞鐘磬到來塵已忘僧房全傍塔祇樹半垂堂山

靜見空色境幽聞妙香因之悟禪意獨坐對斜陽

登海昌城樓

客思殊難遣空樓晚獨憑春陰連極野海色抱孤城歲  
月餘杯酒江湖半甲兵憑欄看劍氣萬里暮雲橫

送蘇大東歸

行行歲云暮相見復何時雲盡鳥飛遠月明帆落遲滄  
江遊子夢芳杜美人期若憶長安別因風寄所思

八日

人日試春衣看山始出扉節中人事少墊裏鳥聲稀樹  
密溪雲重林寒徑草微經旬因病酒久不到漁磯

送沈參軍赴容城

六月懸符去炎雲送馬嘯地經三楚外路入百苗西對  
酒秋花發談兵夜欲嘒功成看佩劍萬里吐虹霓

旅中寒食

逆旅逢寒食花開獨閉門愁深餘白髮客久厭黃昏淪  
落千金盡支離一劍存不堪風雨夕南望欲消魂

送陳進士甯親歸楚

美人思故國南去片帆輕芳草三春色斑衣千里情春  
浮雲夢澤山抱石樓城臨眺還多賦何時寄楚聲

答朱山人見寄

歸來無一事日日坐溪頭白紵新成曲青山忽送秋懶  
隨雲共卧閒與鹿同遊生事何須問門前有釣舟

遊呂巖

亂石屯雲處危崖鑿徑通桃花幾路入雞犬四鄰空草  
長暮山綠霞飛春水紅終期謝塵事棲老此巖中

雲居山麓散步

林皋風日好石磴雨初晴古寺千峯隱前湖一水平煙  
光籠曉寺海色抱春城曳杖時來往閒雲處處生

慈恩寺餞李侍御

祖席臨初地征驂駐夕曛飄揚燕陌柳迢遞晉山雲馳

馬經年別黃河幾路分獨持霜閒去回首惜離羣

和酬金太史雨後見訪

江城新雨後庭樹晚涼多窮巷餘蓬草衡門長薜蘿雲  
空山遠戶秋近月臨河誰似憐岑寂高車夜獨過

龍井試茶

閒尋龍井水來試雨前春欲識山中味須同靜者論雪  
花浮鼎白雲腳大甌新一啜清詩肺松風吹角巾

遊徑山

紫徑春蘿外珠林落照邊孤雲歸帶雨野水去流天慧  
草依慈岸曇花落講筵偶因尋白社不是學逃禪

宿赤松山中訪林道士不遇

龍珠山房集卷上

七

暝煙千澗合春靄四山蒼不見人乘鶴曾聞石化羊洞  
邊蘿月淨溪上水雲涼無寐翻仙籙寒雲滿石牀

新正二日集劉安元宅得香字

履端方二日佳節屆三陽綠酒春醅滿華燈臘炬長鹿  
胞勝鼎饌龍膾試宮香詎用投朱轄歸心醉已忘

送蕭山魏明府北上

潮白海門秋江空曉放舟攀花辭古縣飛鳥上神州邑  
水鳴琴在公田去轡留樟亭一回首載道起歌謳

送嘉興王太守陞四川憲副督水

朱輪辭構李玉節下三巴臘盡峨眉雪春深鳥道花選  
材爲國棟剝木作星槎聖主知名久新堤擬築沙

吳門放舟

獨自放舟行江空野水平桃花迷醉眼楊柳蕩春情曉  
色三吳樹歌聲二月鶯東風吹短鬢又過闔閭城

除夕書寄北試大兒志學

昨聞登北固今想過南徐遙憶臨除夕還應念倚廬不  
同分歲酒聊寄隔年書若有看花信殷勤附鯉魚

送方山人歸雲間

苕溪有舊業何事向雲間亂地居無定孤舟晚獨還寒  
雲江上路殘雪樹頭山對酒莫辭醉風霜摧客顏

送周幼海遊白嶽還吳

白嶽尋仙侶嚴陵訪釣磯好山隨處看孤棹伴春歸石

龍珠山房集卷上

九

瀉灘聲急江空月色微裁詩弄芳杜香滿薜蘿衣

寄謝茂秦

燕昭臺下別多難獨歸遲舊業餘三徑幽棲尙一枝風  
塵迷道路山水憶襟期何日來湖上同君理釣絲

寄臯亭王體仁

故人成吏隱生事久知疏酒熟儘留客俸來多買書詞  
章名獨盛山水興何如不信梁園客無詩慰索居

九日同沈懋學劉安元劉郴州登初陽臺得飛字

互和五首

踐草升丹磴盤雲陟翠微菊花迎社酒蘿薜試秋衣木  
落千山出江寒一雁飛登臨未成賦應愧謝玄暉

凌虛披勝覽九日集初陽一海吞吳壯千山接楚長風  
煙開野色雲日亂秋光興劇還呼酒簪萸醉欲狂  
極目龍山杳登臨感慨生黑雲懸雨色碧樹弄秋聲水  
閣遙分越山寒半入城時憐一杯酒得與孟嘉傾  
高遊臨絕巘移賞憇香臺坐拂三生石同傾九日杯煙  
中秋月出樹杪晚潮回吟眺歡無極芙蓉滿地開  
曲徑縈紆上高臺望轉空山寒借秋碧葉老待霜紅貴  
酒酣湖曲嘗粳飯寺中猶言興未盡吟傍菊花叢

曲山贈汪汝鳴

雜沓千峰轉逶迤一徑分山花斜映日茆屋亂棲雲石  
磴盤紆上溪流屈曲聞誰知幽谷裏亦自有蘭芬

龍珠山房集卷上

三

送梁伯龍歸吳

落葉四郊飛寒霜上客衣孤舟適越至長劔復吳歸世  
路有荆棘鄉山多翠薇莫將和氏淚卻向楚人揮

幽居雜興二首

竹徑人來少柴門鎮日關鶴閒常傍水雲嬾不離山古  
樹秋花發空林夕鳥還於陵甘自隱終老薜蘿間  
江上夜飛霜門前秋草黃墟煙生廣野海日上枯桑縱  
酒從家廢援琴與世忘已成巖壑性嬾慢笑嵇康

秋日山行

幽徑轉林壑斷雲開遠山丹厓萬木脫白首一枝閒水  
落溪邊石花封竹裏關前峯聞有勝日暮復躋攀

遊少華山

升崖牽弱葛踐草入輕煙絕巘浮寒旭長江流遠天荒  
山餘禹迹殘碣記秦年花外諸天近聞鐘斷俗緣

方太守宅賞牡丹

名花招客賞開處媚春陽色奪仙郎綬嬌欺妓女妝露  
華翻錦席霞彩映瑤觴別有甘棠在東風兩地芳

贈呂記室

憐君尚父裔磊磊氣何雄不事家人產猶多國士風談  
兵遊上谷走馬醉新豐爲卻功成賞移家住海東

贈五嶽張山人

昔我遊恒岱逢君燕趙間黃金爭買賦珠履共登山仙

龍珠山房集卷上

三

掌何年別匡廬此日還收將五嶽勝消卻半生閒

同吳子充沈嘉則顧季狂宿响嶼山房得煙字

路入千峯裏盤迴一徑遙偶來閒借榻得與話通宵月  
色籠寒竹江聲落夜潮因之不成寐塵夢已全消

常山旅舍

近楚地先秋頻年向此遊山迴全遶市水盡不通舟過  
嶺分諸粵連灘起別洲不堪鄉土夢夜夜到林邱

江上聽琴留別諸友

對酒不成歡解琴爲我彈離心驚舞鶴幽思感芳蘭幾  
處浮雲度一江流水寒沙頭羣雁落翻使別情難

夏夜喜劉安元過余玉壺別墅

不辭山路遠時復過柴門夜靜炎雲白林繁夕瘴昏玄  
談驚睡鶴清嘯斷嗥猿自覺邱中暑因君盡解煩

雨晴山中獨步

閒居出戶少久雨見山稀林木迴晴翳巖雲帶濕飛花  
嬌日影澹風靜竹聲微散步消煩溽漁歌起釣磯

送劉郴州歸楚

鳳皇山下別離思各恣恩白社歸陶令丹砂老葛洪家  
移三楚遠路入九江空極目揚帆去寒沙落斷鴻

江上

二月桐江上江雲侵棹寒晚風吹藥裏春水漫漁竿玉  
笈閒來閱青山睡起看病餘成懶慢久矣不簪冠

湖上

龍珠山房集卷上

三

錦帳開桃岸蘭橈繫柳津鳥歌如勸酒花笑欲留人鐘  
磬千山夕樓臺十里春回看香霧裏羅綺六橋新

送唐子靜之延平

憐君多道氣白首曳儒裾地勝堪尋樂官閒好著書晚  
虹生澗浦春雨長楸欄多士傳經後裁詩寄索居

送金兩桐師

夫子江南去長楊獻賦歸孤帆天際沒遠樹望中微旅  
館仍懸楊寒宵自掩扉西湖讀書處燈火夢相依

同高光州方困學沈懋學劉安元集雲居縉上人

萬木鳴秋處雲深隱梵宮花飛蓮界雨鐘散石樓風竹  
外湖煙密窗中海月空浮杯如可渡一醉與君同

吳山晚眺

獨自尋幽勝攀緣縱野情暝煙千嶂合斜日半江明潮  
落漁沙闊風高鶴羽輕飄然物外興還逐晚霞生

同心芙蓉

蓄蓄發金塘亭亭並蒂芳同心羞蛺蝶交頸學鴛鴦掩  
映凝霞色輕盈共鏡妝幸因生太液常得近君王

舟中別吳門諸友

五龍橋下別落日滿吳江意氣自相合離心不可降鶯  
聲隔柳岸波影亂篷窗何處思君最寒花落夜釭

龍珠山房集卷上

三

訪太湖鄒隱君不遇

山轉石橋危籬邊野蔓垂春深花徑窄歲久草堂歇舊  
業千株橘新題滿壁詩人來多不見惟有水鷗知

送孫山人還天台二首

笑我迂疏性愛君巖壑姿隱能甘自老狂不畏人疑茶  
過盧仝僻詩耽賈島奇明朝欲別去云有石梁期

歸去天台路城霞遶郡紅鹿裘披海雪鶴髮亂山風酒  
熟茆茨下梅開島嶼中不知明月夜吟賞與誰同

舟中除日

歲月將除日冰霜尙旅遊青陽催白髮玄思渺丹邱野  
僻炊煙少城孤晚市收定知今夕夢飛遶故山樓

秋夕集劉山人家

君家住翠微秋色滿巖扉海月隨潮起寒雲帶葉飛竹  
風清水簾簷露濕倚衣坐愛閒情好長吟夜未歸

月夜與客集吳山得消字

朗月出林標空山紫霧消笑持金谷酒坐聽畫樓簫遠  
寺鳴秋磬寒江落夜潮西風起邱壑叢桂復誰招

心壺贈莊道者

五湖常作客三島欲移家虛室藏神氣懸壺貯日華煉  
砂成玉蕊鑄劍作青蛇擬採金光草隨君躡紫霞

龍珠山房集卷上

十四

龍珠山房詩集卷上終

龍珠山房詩集卷下

明 錢塘李 奎 著

五言律詩下

癸亥元旦喜吳山人遠至

歲星方改亥斗柄喜回寅  
蕙莢生初旦梅花報早春  
九衢歌管沸萬井綺羅新  
柏葉堪稱壽尊前有故人  
春日東嶽道院訪徐待詔留飲得縫字

仙院覓仙蹤春山上幾重  
榻方雲裏下花正酒邊濃  
竹簡殘猶讀荷衣碎嬾縫  
留余看明月石上倚寒松

新春集郎仁寶宅

著書常閉戶垂釣幾登臺  
野客同春至華尊對雨開  
舊家餘古木晚節見寒梅  
聖世聞徵隱蒲車只恐來

龍珠山房集卷下

一

新正雪中集施引之宅

白髮添新歲青陽轉物華  
笑穿東郭履來訪邵平家  
柳漫春先絮梅傾臘後花  
不妨寒色重玉甕瀉流霞

李明府宅宴集

解組賦歸來憐君抱隱才  
門前栽五柳庭下長三槐  
句好人爭誦機忘鳥不猜  
日閒無一事招客共銜杯

旅中送錦衣周禎泉南歸

相逢能幾日相送復南歸  
湖上尋春草花間醉夕暉  
已投班氏筆莫戀老萊衣  
卻笑羈棲者年年夢故扉

早春途中寄朱甯州

流澌開綠水，雒雉震青林。物色更時候，春光蕩客心。風雲違壯志，山水阻幽尋。谷口聞黃鳥，思君寄遠音。

馬懷玉周一之春夕攜酒過訪

孤館蕭條夜，燈花晚自開。故人攜酒至，新月上簾來。賦就春迴雪，歌殘夜落梅。天涯同一醉，莫惜玉山摧。

春日同相明臣明卿昆仲登慈雲絕頂

百折梯雲上，江迴石磴斜。曙煙開嶺瘴，春路入山花。梵宇標金刹，仙臺控紫霞。機雲同眺覽，吟賞與偏賒。

咏雨

四野玄雲起，遙空片雨來。遲遲過灌道，瑟瑟度陽臺。葉上隨鳩至，花間逐燕迴。無因假輕蓋，獨惜濟時才。

登泰山

龍珠山房集卷下

二

日觀攀緣上，凭虛望眼開。山川分禹貢，雲氣接蓬萊。路擬通霄漢，身疑近斗台。長吟追往事，斜日下封臺。

集王元器湖舫和田水竹韻

夏日蘭舟泛，堤迴碧草長。隔簾山翠重，拂艦芰荷香。水入吳歌調，霞傾魯酒光。最憐新雨霽，滿路熟梅黃。

方氏漱芳園

君家讀書處，宛若董生園。地隱林邱僻，徑開花竹繁。香芸浮藝苑，灌水入仙源。盡日長吟坐，干峯擁辟門。

夏日同友人遊湖上山寺

鷺嶺披雲度，龍宮避暑過。暗泉鳴水壑，涼氣入松蘿。徑

寂聞幽鳥風香度遠荷時同白社侶一採紫芝歌

同方山人山行

言尋湖上勝不憚暑炎侵幽境入芳草涼風生竹林青  
山行載酒綠水坐鳴琴客有於陵侶行歌共此心

與客遊北山偶過普福院尋葛洪丹井

古寺隨緣到雲霞晚自閒僧房開竹裏仙路入花間斜  
日明秋水薄煙凝暮山因探句漏迹惆悵欲忘還

贈劉安元得古冠

雅稱烏皮几全勝白接離長吟風下便短杖月中宜賀  
監還山日玉維歸輞時常簪遊五嶽猿鳥不相疑

寄挽庸上人

龍珠山房集卷下

三

聞道辭蓮宇觀空入上乘無衣留建塔有錄可傳燈遺  
鷓依慈樹哀猿掛古藤因思明月夜淒斷白雲層

同曹時化遊柯山

同來春已暮瑤草正開花翠壁懸新雨青天落紫霞空  
中聞鼓吹谷口長桑麻惆悵不歸去人間幾歲華

歲暮舟中得收字

臘盡歸心急揚帆夜未收凍雲江上路殘月水邊樓卒  
歲全憑酒爲家半在舟那知五湖興白首更悠悠

甲子元日吳子充與諸友過草堂嘗園蔬

佳節屆三陽文星聚草堂歲元逢甲子月令建春王柏  
葉浮尊綠梅花過雨香山厨無可薦聊翦五辛嘗

九日登南屏山房

篠藤盤古磴幽徑出林端暮檻閒來倚秋山靜可觀湖  
煙入戶白雲氣上衣寒醉折黃花去西風吹鷓冠

訪郁山人

亂壑藏幽境孤煙自一村鑿田耕谷口結屋住山根得  
句書黃葉逢人倒綠尊猶看可憐處雲氣滿柴門

送僧玉冷歸金山

浮玉江心寺經行此日還一杯遙渡海雙錫獨歸山孤  
影入雲寂幻身臨水閒手栽松已長應掩舊時關

二月十九日遊天竺寺

二月來天竺珠林動早春語鶯成果鳥遊女獻花人楊  
柳垂甘露菩提現妙身願依觀世法一接渡迷津

龍珠山房集卷下

四

夏日同王屋張玄超劉安元諸友集沈懋學宅限

韻

江城梅雨歇高館正迎薰留客看山月開尊傍晚雲談  
奇落珠玑會雅聚星文縱飲成河朔渾忘坐夜分

爲友人悼妾

學鳳人初去爲雲夢不通影孤傷舊鏡怨切感新桐翡  
翠薰爐冷芙蓉曉帳空惟餘砧杵在寂寞起秋風

贈孫山人

憐君棲隱處彷彿似桃源一水綠當戶千花紅映村閒  
移山入畫輿對客開尊白首田廬下何曾識縣門

遊巖谷

每臨山水勝便有卜居心落日千峯裏桃花一徑深人家依水谷雜犬隔雲林但恐忘歸路重來不可尋

曉過吳門歸源訪郭少卿

行盡水邊路忽逢雲外山鳥嘯春樹裏花發曙林間樓迴千峯出庭空一鶴閒草玄人未起紅日滿巖關

過徐弔子房山

報韓心已白助漢業初成若不拂衣去甯高千古名清風鳴水壑殘雪映山城歸路村煙晚寒雲滿地生

和施引之山亭紅白梅花韻

庾嶺移來久相看色白奇春歸一本樹花發兩般姿掩

龍珠山房集卷下

五

映天桃面清輝白雪肌可堪醒醉態不負歲寒期

長安九日見遊絲有感

九日見遊絲驚看物候違飄揚迷客眼斷續惹征衣不作牽花舞翻隨落葉飛誰調鄒子律幽谷轉陽暉

庚戌晚朝

三殿垂衣日千官拱笏時直言爭士節喜色動朝儀返照開宮扇高雲拂羽旗遙聞宣鳳詔推轂出王師

晚過碧雲寺

短杖隨流水長吟步夕曛來尋黃葉寺擬宿碧山雲暮靄雙溪合昏鐘亂壑分偶因乘野興詎用遠公聞

旅思

一作帝京客十年猶未還風塵迷越望胡騎滿燕關骨  
肉于山外形骸萬馬間王師未聞捷何以慰愁顏

送陳憲副督學四川

名自吳中望文稱海內宗百花迎彩鷁三峽起蛟龍雪  
霽巴江迴雲開鳥道重如過浣溪曲一訪少陵蹤

天壽勝果山閣訪淨上人

日落千峯靜江寒一閣危蟬鳴幽徑早月出茂林遲輶  
口閒摩詰祇園老辟支坐憐空寂意曾與白雲期

沈青門快園雅集

蔣徑開三益稽亭宴七賢春風散酒氣山翠蕩茶煙雨  
斷殘虹外花飛曲檻前雅吟酬盛世酣醉欲忘還

龍珠山房集卷下

六

賦得迷花不事君

結得桃源伴逃名不爲秦卧香高一世釀酒醉三春把  
菊思陶令披蘿學楚人已忘軒冕貴無夢到楓宸

送友人還吳

名山任所往春盡始還家鄉路成芳草離尊對落花吳  
天遙隔樹浙水曲迴沙落日揚帆去風前惜斷霞

秋夜草堂餞劉達泉歸廬陵

江月照林堂條風起夕涼朱絃翻別調翠羽薦離觴瑤  
海仙人裔洪都帝子鄉秋歸廬嶽下籬菊正垂黃

吳門弔周一之與其嗣君別

悲歌春水上戀戀落花前綠酒不辭醉素琴從此閒飛

雲停茂苑斷雨隔寒山知己已零落孤舟嗟獨還

送友人汝甯訪徐太守

爲儒無厚業白首欲依劉吳楚三秋路齊梁千里遊孤吟尋洛社獨影度河流倘見南飛雁傳書慰遠憂

贈關中朱義士

慷慨抱高誼驅馳見古風請纓來海上仗劍出關中百戰重圍解千金一諾空功成不受賞名與魯連同

青霞山房訪句章沈嘉則不遇

山路日西曛蟬鳴處處聞竹深寒靄合花暗野泉聞草砌堆黃葉石窗生白雲論交愧麋鹿漂泊未成羣

哭周一之

龍珠山房集卷下

七

忽憶長安別悲歌動遠愁冰霜塞外路風雨客邊樓饋藥憐同病分金贈遠遊一餐猶未報彈淚看吳鉤

九日承顧季狂竹杖見寄

九節傳來遠重陽正好支登臨還有助吟倚更相宜江上聽潮處山中步月時只愁龍化去何以藉維持

閒居

曉日上茅茨寒花開竹籬病餘憐鶴瘦秋盡愛山奇興對尊中酒閒消石上碁端居還自媿無補聖明時

賀草堂朱直夫遷居兼壽六秩

芳春逢誕日喬木喜鶯遷堂迴花爲錦筵開酒似泉盃鄰通絳里謝樹出藍田百歲茲庭下年年醉管絃

有懷贈盧君錫

誰似衡茅下有懷常自悲趨庭終夜夢負米百年思木  
落風迴處烏嘯月上時曾聞諸弟子久廢蓼莪詩

旅中哭東川顧院使

燕市行歌日惟君獨見知未酬推食願又賦哭君詩客  
夢驚霜角鄉關隔鼓鼙中宵望不極腸斷海天涯

挽童南衡

北地同遊日南荒遠謫年常疑隔生死猶得聚林泉薤  
露還多恨青雲竟可憐躑躅明月夜從此罷談玄

五言排律

送南宮山人顧季狂遊武夷

龍珠山房集卷下

八

落日樟亭上離心醉欲飛人隨秋鳥去帆入暮雲微沙  
曲增潮路江寒添客衣如何臨歲杪翻與故園違身向  
江湖老名因詞賦輝東閩山水僻南壤雪霜稀選勝窮  
丹壑尋仙歷翠微還疑顧思遠重見謝玄暉鶴控山猶  
在亭空事已非峯頭逢玉女慎勿戀忘歸

酬別小池周一之

海內論交久天涯喜見君一言輕白壁高誼薄青雲直  
道忘時忌清才出俗紛題詩驚七貴草檄動三軍感慨  
青蛇劍風流白練裙玉河朝結社錦里夜論文寂寞憐  
同病艱難念獨慳擬將葭倚玉翻作雁離羣回首都門  
遠悲歌落日曛撫心非木石佩德重蘭薰神劍終期合

瑤琴暫惜分客懷那可道世態詎堪聞舊業漁竿在垂  
綸向海濱

和虎泉施引之雨中見訪

陋巷稀人事江城風雨頻客來纔下榻日午未籠巾寂  
寞牛羊徑蕭條桃李春馬卿常抱病原憲不因貧已迂  
蘭爲契還憐德有鄰焚香開草閣撫景及花辰起坐依  
場圃行吟向水濱才應王粲並業與邵平倫巖壑甘栖  
息風塵厭苦辛形容嗟我老詞賦愛君新忽憶長安日  
曾攀上苑春幾投班氏筆不羨霍家親寶劍酬明主黃  
金贈故人雄圖輕燕雀勛業重麒麟杖引東山妓樽邀  
北海濱萱花方競茂玉樹自堪珍盛世辭簪組青山訪  
隱淪竹間泥漲路門外水平津村釀初浮蟻盤猩媿乏  
脣留連莫嫌畧談笑見吾真

恩榮雙壽圖爲熊方伯賦

龍章分寵日鶴髮喜齊年並莢生堯世雙星照郢天杖  
頭鳩比翼花底玳鋪筵列鼎陳天祿開堂接地仙海桃  
呈三實庭鶴舞聯翩鸞鳳絃歌麗鴛鴦畫錦鮮紫紵輝  
日月爛彩燦雲煙甲里三槐第靈文五嶽篇用歌嵩嶽  
頌願祝壽如川

新正同望陽山人劉安元宴高光州宅觀燈

新春錦里會良夜綺筵張對石雲凝座鉤簾月滿堂瓶  
花寒吐玉簷雪煖流香燈列珠璣燦杯浮琥珀光畫屏

圍錦繡紫障隱笙簧玉椀銀鱗細雕盤甲菜長海蚺合  
宿露林橘帶秋霜促席嫌宵短分題得句芳朱輪閒竹  
徑畫戟掩山房能使劉伶醉還從李白狂春風彌海宇  
曉日上扶桑蓬島連邱壑雲山隔帝鄉共歡逢盛世歌  
咏答青陽

別錦衣周用之

君才班馬流懷策土神州名繫當時望身懷報主憂一  
朝思擲筆萬里覓封侯勛貴爭傳畧風雲屬運籌行揮  
白羽扇坐擁紫貂裘結駟通仙籍分金念遠遊慚余一  
竿去歸老越江頭

送周二南還省親

龍珠山房集卷下

十

同爲都下客已是十年餘羨爾今歸去慚余尙索居風  
塵嗟此別鄉國思何如海嶠孤雲外吳山落日初彩虹  
看劍氣畫舫載圖書著錦能懷橘垂班尙倚廬晚風吹  
紫稻秋水足鱸魚莫爲湖山戀雲霄待使車

長安春日同中翰馬懷玉遊西山諸寺

紫甸春風早珠林慧日長閒同池上客遍禮法中王梵  
樂彌空響天花拂地香龍宮雲氣白虎逕石苔蒼澗樹  
藏經閣山泉繞畫廊清吟消物慮瀹茗坐僧房

送比部李滄溟出守順德

鉅鹿當三輔邢臺控百城鶯聲花外路熊首馬前旌濁  
水漳河渡黃雲漢戍營共推王霸政爭羨李膺名露冕

三春去舉帷列郡迎都門攀弱柳望望不勝情

送朱九疑守甯州

客中仍送客不耐柳條何芳草分長陌青樽惜短歌春  
雲隔楚甸落日滿滄沱驛路雙旌遠鄉山五馬過名推  
龔遂重才擬長卿多訟少民還朴心平政自和離亭一  
回首惆悵渺煙波

曉山王元器園中小山疊成寄贈

聞君居輞口卜築事林邱綠逕通花嶼卿雲映畫樓庭  
空春黛淺簷迴曙煙浮城市藏巖壑琴尊寄釣舟葉深  
嘯翠羽泉細落紅流竹裏招朋飲花間拉妓遊猶疑坐  
金谷彷彿在瀛洲更羨芝蘭秀還臨水石幽鉤簾對萱

龍珠山房集卷下

十一

草終日自忘憂

田節婦

白髮榮旌日青春苦節年風霜豈一夕生死隔重泉菽  
水終姑養丸熊教子賢獨持鴻鵠操肯負柏舟篇志與  
冰同潔心隨石共堅名芳歸太史終古傳中傳

遊越中探禹穴書寄虛明姚抑之

惆悵同君別揚帆向越中人家全傍水樓閣半凌空俯  
仰偏多勝登臨惜不同玉笥天柱外金觀海門東書穴  
藏神禹仙巖隱葛翁湖回舜江綠花發剡溪紅獨步情  
何寂孤吟思轉雄豐碑曹女廟衰草越王宮迹散憐麋  
鹿詩成望雁鴻相思頻有夢夜夜渡樵風

七言律詩

夏日同豐吏部王司馬徐比部劉山人集雲居聖

水寺

偶來初地避炎氛，香滿雕臺日正曛。  
未信魚龍猶聽法，自憐麋鹿不離羣。  
崖前紺樹遙侵漢，湖上青山半出雲。  
趺坐長吟孤月起，諸天鐘磬隔林聞。

送王中翰還吳

西風易水三秋別，落日吳門萬里天。  
白社琴尊分夜月，青山雲樹隔風煙。  
新豐紫稻還家熟，震澤銀魚入饌鮮。  
聖主正思王逸少，逢人莫寫換鵝篇。

長安冬夜同謝茂秦吳子充周一之馬懷玉施引

龍珠山房集卷下

七

之包庸之願季狂集羅山甫館

虛堂夜靜雪初晴，坐聽吳歌欲二更。  
綠酒春浮琥珀盞，白雲寒度鳳皇城。  
天涯萍梗他鄉會，歲暮梅花故國情。  
歡賞只愁宮漏盡，共將燭刻限詩成。

送徐諫議儀岡北上

鸞唳江郭亂花飛，二月乘春上帝畿。  
池上鳳凰仍有伴，山中猿鶴竟何依。  
日懸雙闕明青瑣，星列三垣近紫微。  
聞道聖朝無闕事，日將簪笏侍垂衣。

和童侍御早春偕社中諸友攜美人登吳山觀雪

韻二首

玄館芳尊對雪開，美人詞客共登臺。  
陽春暗逐歌聲轉

紉素低隨舞影迴，仄島平沙迷落雁。凍雲殘照映寒梅，  
茲遊不忝梁園會。重見羣公作賦才。

雲擁仙廬雪色闌，褐衣來伴豸衣歡。樽罍宛向冰壺舉，  
樓觀疑從月窟看。賸有梅花隣孟浩，豈無車馬問袁安。  
鄧歌新調應難和，并入瑤琴曲裏彈。

淮上期沈山人不遇

揚子江邊楊柳黃，尋君不見下維揚。黃河曲裏冰爲渡，  
青浦沙頭月似霜。水國夜寒鄉夢遠，天涯歲晚客途長。  
梅花折盡憐何遜，安得相逢一醉狂。

春日途中寄西湖社友

客路經春雪未消，行將尊酒度花朝。豈無幽思生春草，  
不耐離情見柳條。北極樓臺雙闕近，南天鴻雁尺書遙。

龍珠山房集卷下

三

思君此日西湖上，畫舸同誰泛六橋。

寄遼陽李都督

聞道霓旌度海遼，將軍不數霍嫖姚。九邊秋色行看靜，  
萬里妖氛坐見消。戰罷每披青海月，獵回常射黑山鵞。  
知君定掃單于壘，直使疆胡識漢朝。

送比部凌雙橋北上

星槎秋返白雲司，便道甯親眾所奇。千里承顏披彩服，  
九重趨命入丹墀。堤邊楊柳霜初淨，闕下芙蓉露正垂。  
聞道臯陶今繼美，況逢明主是虞時。

送龍灣徐太守之汝甯

露冕承恩出帝鄉，長安陌上柳初黃。一尊對惜離歌短，五馬嬌嘶別路長。西洛雲山連汝水，北平煙樹隔河陽。遙知列郡牽帷日，花擁朱輪拂綬香。

新春旅邸

天涯作客笑歸遲，病起難忘濁酒卮。芳草未舒遊子恨，寒花獨發故園思。敝裘不耐春多雪，衰鬢其如日轉絲。南北風塵增感慨，玉盤生菜此何時。

金陵早春和沈懋學韻

燕子磯頭春草生，鳳凰臺上曉雲平。江浮島嶼迴仙閣，樹帶煙霞遠帝城。風景不孤遊子興，鶯花何限麗人情。遙知沈約多騷雅，幾向秦淮醉月明。

龍珠山房集卷下

一四

之山吳子充過草堂話舊

黃金臺上同遊日，紫氣關前悵別時。萬里風塵增感慨，十年蹤迹各支離。煙霞顧我閒逾僻，詞賦憐君老更奇。白首又逢滄海畔，論心惟有水鷗知。

北送吳山人還金陵

湖上春晴花欲開，故人又向秣陵回。那看白髮頻分袂，強對青山數舉杯。短棹去隨鷗鷺侶，長歌獨上鳳凰臺。舊京冠蓋應相迓，定有新詩日共裁。

南遊別沈懋學劉安元時各有所往

春歸未幾復辭家，南越東吳路轉賒。對酒已分三地月，賞心虛負一年花。可堪芳草迷詩夢，不斷青山引釣槎。

自笑孤雲無定迹又隨鷗鷺宿漁沙

送方山人

長安白首逢君日共惜風塵一劔孤漫說探奇窮五嶽  
曾聞作賦擬三都嵇康老去惟耽酒張翰秋歸不在鱸  
明日又成千里別白雲回首滿江湖

贈俞清湖

清湖湖上是君家門帶寒流一逕斜  
遶屋遍栽彭澤柳隔溪環種武陵花  
林中歲月唯棋局湖上生涯只釣槎  
我欲買田同負郭與君白首話桑麻

送介山林二守歸天台

歲暮揚帆海上歸赤城霞彩映仙衣  
亂山雪霽春淨郭

龍珠山房集卷下

五

三徑梅開月滿扉賦就子虛名  
獨盛樓登王粲事多違  
只今聖主虛前席莫向滄江理釣磯

送少白梁伯龍

露滴江城曉月輝送君獨向闔歸  
梅花笛裏愁還落楊柳霜中折更  
稀秋水路分千里斷白雲天盡一  
帆飛不堪別後相思處寂寂空山  
自掩扉

送周總戎之山東

羨君曾讀五車書諸將風流盡不  
如方著錦衣遊素里又看旌旆入  
青徐營開細柳春風靜劒吐長虹  
夜氣虛倘過徂徠見山月相思莫  
惜寄雙魚

登吳山尋白鹿泉青衣洞望海門

空山樓閣紫煙飛，縹緲笙度夕暉。不見仙人乘白鹿，空傳童子著青衣。巖前石冷春雲卧，江上風生晚汐歸。獨倚長松待明月，海門何限暮山微。

贈濟上百歲老人

鶴髮垂肩百歲餘，自言曾著養生書。灌園獨藉花間老，賣藥時來濟上居。生事盡從壺裏隱，計年久向曆中除。丹成若往蓬瀛去，好過西湖一訪余。

長安春日同諸戚貴郊行

夾道長楊拂御溝，鳳城煙霧隱重樓。春歸禁苑千花發，日上宮雲五色浮。南陌遍嘶金勒馬，東風猶戀紫貂裘。黃金臺下尋芳草，又逐王孫向此遊。

龍珠山房集卷下

六

拜岳武穆墓

扈驛南來事已非，昔人無復念青衣。朱仙鎮上貔貅散，五國城中杜宇飛。芳草一朝埋戰骨，浮雲千古蔽斜暉。可憐割據成和議，江北江南淚欲揮。

新正人日雪中與客泛舟

歲時行樂欣逢雪，人日尋芳喜見梅。作賦欲追梁苑興，乘舟不是剡溪迴。陽春盡入琴中調，淑氣初回掌上杯。仙館更憐移賞處，萬山寒色擁樓臺。

送朱甯州遊天目

浮玉山空秋氣寒，并戈仙掌總奇觀。洞中假榻和雲宿，花裏尋芝帶露餐。自愛煙霞隨杖履，不教麋鹿笑衣冠。

重陽又近西湖社莫使茱萸兩地看

懷謝茂秦遊薊門

長安東望薊門秋落日滄茫海氣浮絕塞風高黃葉下  
空山夜靜白雲流可堪月色餘僧榻不耐笳聲入戍樓  
遙憶登臨謝康樂莫因詞賦重淹留

別黃雲泉

感慨高歌擊唾壺君歸三楚我還吳匣中離劍有時合  
海內遺珠何代無對月且傾燕市酒乘秋還釣漢江鱸  
臨歧莫灑楊朱淚萬里雲霄有鳳雛

馬懷玉席上留別玉河社友

烏嘯宮樹曉將行握手長歌對月明故國戰餘歸去疾

龍珠山房集卷下

七

天涯客久別離輕秦淮冰雪三冬路燕越雲山兩地情  
獨抱一竿江上去相逢何日話平生

和童侍御春日見招同徐待詔諸公遊集慶寺過

澗西訪响嘯居士韻

辭榮每羨碧山情春日還招物外行問法已忘人避馬  
尋幽正喜谷遷鶯水邊峯朶青雲出塔上珠光白晝明  
更向給孤尋大士鉢羅花底說生平

玉河橋見白燕

白玉河邊白燕飛差池雪羽弄春暉還從鸚鵡班中出  
疑向蟾蜍影裏歸瓊樹並棲花露重珠簾斜度柳風微  
聯翩更逐輕雲去水殿星橋望轉稀

八月十七夜集高光州園亭分韻得珠字

君家池館甲南吳此夕張筵對畫圖八月涼風生玉樹  
九天寒露徹冰壺桂輪漸減杯中影蚌暈猶含座上珠  
翻笑石家金谷夜滿堂紅燭照珊瑚

宿彭城柬吳主政

歲暮天寒歸去遲獨眠山郭笑支離燈前形影憐多病  
雪裏綈袍感故知半夜忽醒蕉鹿夢十年深負海鷗期  
梅花開遍西湖上猶自行歌泣路歧

舟中呈少溪兄

客程日日泛中流歲暮何如尙遠遊結伴喜同青雀舫  
還家笑著黑狐裘燃燈聽雪臨淮岸沽酒衝寒上楚樓

龍珠山房集卷下

六

明日又知何處宿水雲東盡是揚州

寄薊州趙南園

胡笳八月動邊愁越客三更獨倚樓新夢乍分黃葉雨  
故人遠隔白蘋洲雲中沙磧經年別海上雲山若箇遊  
何日爲沽燕市酒與君同醉薊門秋

瑞蕉池上餞龍川徐比部得塵字

十年惜別隔風塵池上逢君正早春洞口寒花還向日  
林中孤鶴漫隨人感時且著登山屐混世難忘漉酒巾  
握手放歌成劇飲不知斜日下江津

春日同諸葛問渠唐木瘤二山人登吳山弔古

第一峯頭振薜衣閒雲滿地坐忘歸半山宿雨晴猶濕

萬井春煙翠欲飛，南國樓臺餘悵望。西湖花柳自芳菲，  
可憐吳越空江在。惟見寒潮送夕暉。

雪夜登雲居庵訪縉上人

千家寂寞掩柴扉，一逕迢迢上翠微。野寺殘更驚客到，  
春風正月見花飛。燈明雪屋僧初定，雲掩松巢鶴未歸。  
獨遶長廊吟不寐，自敲寒磬叩禪機。

送張少府之延平

憐君捧檄向延平，意氣飄飄一劍橫。江上斷雲秋雨過，  
馬前斜日晚虹生。棠寮對酒花明縣，清夜聽琴月滿城。  
此去定知多茂績，獨依芳樹聽鶯鶯。

過淮有感

龍珠山房集卷下

九

漂母祠前冰雪深，淮陰城下日西沈。堤邊衰草王孫路，  
水上孤雲遊子心。淮海風塵增感慨，山川形勝幾登臨。  
臨流不盡懷賢思，倚劍高歌動楚吟。

送朱參軍之廣西

黃金臺下送君行，握手論心意氣橫。客路中分聊藉酒，  
鄉關南望未休兵。風塵遠入三苗地，沙草遙憐萬里程。  
莫道白頭趨幕府，陳琳草檄重時名。

嘉興遇寇

范蠡湖南悵夕暉，孤城初解百重圍。天星渚上春蕪綠，  
煙雨樓中燕子飛。歲月漸衰邱壑鬢，風塵不耐芰荷衣。  
愁看白骨郊原遍，咫尺西湖阻未歸。

春日雪中登吳山漫興  
雲滿吳山杖屨輕  
春風林壑路歧平  
吟邊放鶴看無影  
靜裏凭欄聽有聲  
寒色壓城天欲暝  
煙光淨市暮還明  
興來沽得壚頭酒  
笑對梅花自解傾

送許永州之任

河橋日落酒盈樽  
擊劍長歌送許渾  
六月蟬聲江上路  
百蠻秋色雨中村  
山花處處迎朱紱  
雲氣程程擁畫轅  
莫謂遐方聲教遠  
文翁能使蜀人尊

五言絕句

採蓮曲

妾向花間去  
郎從葉底來  
採花不採實  
苦心向誰開

龍珠山房集卷下

二

子夜歌

挑燈理素絲  
絲亂心亦亂  
其如斷續情況復  
聞嘸雁

山中獨步

夜靜天無雲  
山空月初上一  
笑梅花開清風遶  
藜杖

泛湖

日落青山外  
煙生野樹頭  
銜盃待明月  
獨自放中流

溪上雜興

亂藤懸古壁  
怪石枕寒流  
竹迳無行客  
花溪有釣舟

浣沙溪上女  
短袖綠羅新  
兩兩踏歌去  
春江愁殺人

泊釣臺

山昏雨欲來  
風急舟不開  
沽酒同漁父  
長歌上釣臺

孤飛白燕圖

明月梨花夜孤飛自不羣誰家新夢斷何處玉釵分

咏茶圖

雪夜冰壺傳春風白玉盤無人知此味擊節自相看

對酒

我雖不解飲把酒心還悅醉裏不知秋醒見千山白

山行

斷壁懸秋雨高崖落晚霞忽聞雞犬吠雲外有人家

六言絕句

村居雜興四首

古樹牛羊村巷短牆茅屋人家閉戶不知春至繞籬開

龍珠山房集卷下

三

遍梅花

布穀聲中煙雨黃鷗谷口春風處處牛眠芳草家家花

落殘紅

隔水鐘鳴夜靜入雲犬吠山空白板扉中明月轆轤井

上梧桐

村北村南雞犬屋前屋後桑麻妻奴亦便山水兒童也

愛煙霞

訪江郎周高士

綠樹深藏丹壑白雲時遶紅泉閉戶經年不出松梢但見茶煙

玉壺別墅卽事

石上孤雲自起洞前零雨時來山風吹酒易醒滿地閒  
花亂開

七言絕句

送梁伯龍歸吳

越王臺上夜飛霜西子湖邊柳盡黃欲贈別離惟有月  
隨君西去到金閶

漫興

日落江空秋水平海門東望暮潮生閒將鐵篴論心事  
吹落殘霞滿赤城

六峯呂翁

天姥峯頭自結廬桃花千樹少人居雲霞應滿門前地

龍珠山房集卷下

三

聞道白頭猶著書

湖上曲三首

西陵橋畔日西斜醉後何曾別酒家一道綠楊迷去馬

滿身紅雨落桃花

芙蓉灘口百花開楊柳洲前蕩槳來江上寄書潮是信

水邊得句葉爲媒

六橋春水映紅妝羅帶風吹滿路香笑入桃花看不見

半遮團扇出斜陽

雪中詠

北風吹雪捲胡沙夜宿燕南賣酒家醉裏不知身是客  
笑吹長笛落梅花

贈姚記室二首  
千金不惜買吳鉤一諾逢人意氣投解贈何曾問名姓  
狂歌笑入酒家樓

玉缸酒熟百花香獵射回來客滿堂明月入簾秋漏永  
琵琶聲裏夜飛觴

山中逢龍陽徐待詔

金馬門前待詔時六宮爭唱步虛詞歸來只有雲霞識  
萬水千山一杖藜

江上送曹時化遊雁蕩

霜落樟亭潮水寒送君無語坐更闌相逢雁蕩山前月  
須記錢塘江上看

龍珠山房集卷下

送范訥庵遊長安

寂寂寒江鷗鷺秋白雲回首思悠悠君今又向長安去  
明月五湖空釣舟

江上送客

月白霜寒歸路遙滿汀黃葉雁聲高孤舟今去泊何處  
卧聽空江落夜潮

漁家

翠竹寒煙沙上村一江春水抱柴門釣船晚繫垂楊下  
姑婦捉魚翁哺孫

題楊紫溪小畫

孤亭獨立思依依隔岸蒼茫出翠微日落江空人不見

片帆遙逐浦雲飛

塞上

黃河冰合凍雲低風捲胡沙萬馬嘶日落榆林見烽起  
銜枚夜度玉關西

嚴陵道中

潮落江空水滿汀芙蓉兩岸暮山青月來渡口灘聲急  
自採蘋花薦客星

過王龍溪司馬金波園三首

湖上春來水滿堤百花開處亂鶯啼主人高枕陰符卧  
閉戶不知山日西

背郭堂開湖水前湖波拍岸水連天白鷗飛處青山暝

龍珠山房集卷下

十四

坐聽漁歌出晚煙

草閣西臨煙水空白雲閒度晚來風王喬自愛樓居好  
夜夜吹笙向此中

與劉安元飲酒家二首

門前高柳亂鶯啼樓上春風醉欲迷少婦當壚矜艷色  
笑將團扇索新題

洞庭春酒釀葡萄亂後逢君脫寶刀且向壚頭沽一醉  
木蘭花下坐聽簫

龍珠山房詩集卷下終

龍珠山房集補遺

客夜

寂寞空山裏，萋萋路草繁。歸雲帶雨至，宿鳥踏花翻。客舍臨滄海，春風隔故園。離心不忍聽，斷續夜啼猿。見明詩正

聲

岳王墳懷古

醜虜南侵國步衝，將軍百戰見孤忠。銜冤竟死姦權手，雪恥誰收敵愾功。耿耿赤心猶貫日，稜稜殺氣尚摩空。荒墳三尺西湖上，荆棘淒涼暮雨中。見岳集

詠湖上新柳

依依弱柳不勝春，裊裊垂條向水濱。柰何輕盈愁少婦，豈堪攀折贈離人。煙消翡翠眠初起，風折腰黃舞乍新。龍珠山房集補遺

龍珠山房集補遺

一

猶喜芳心未成絮，肯將眉黛向人鬢。見湖山詩選

周與鹿給諫宅燕集

暫辭瓊掖臥東山，行樂春來每閉關。問字每通玄草處，留歡同坐落花間。簾垂白日圖書靜，堂迴青雲燕雀閒。聖世豈能忘獻納，如君夜夜夢朝班。

送與鹿給諫北上

暖曖青陽別思長，官河楊柳正垂黃。欲傾葵藿扶明主，肯爲雲山戀故鄉。花裏掖垣春漏靜，池頭曙色曉星蒼。漢庭此日求賢急，前席應虛是夕郎。見周氏家藏

山家

獨坐草堂靜鳥鳴春晝長呼童掃鶴徑看婦葺蠶房山  
果垂枝熟野花沿路香興來歌濯足乘月弄滄浪

宿南屏寺

鹿苑干花入龍宮一海連虛窗懸水月孤榻臥寒煙有  
想皆成妄無家卽是禪夜深人靜語鐘磬落諸天

李响巉山居分韻得潮字

叢桂山中每見招偶隨孤月渡溪橋霜輕徑草寒猶翠  
風定林香鬱未消千澗紅泉空外落一林黃葉靜中飄  
回看鷺嶺諸天出鐘磬時聞雜海潮

宿靈隱寺有懷秦山人

風巖冰壑晚蕭蕭古寺寒燈照寂寥故國雲山千里隔  
他方鴻雁尺書遙可堪月色迷殘雪不斷鐘聲送落潮

龍珠山房集補遺

二

回首故人鄉夢遠滿庭叢桂爲誰招

早春登吳山看雪還憩蕉池

獨倚層巒望早春萬家樓閣翠煙新天邊孤嶠晴迴雪  
杖底閒雲冷傍人歲月新添牛馬齒風塵不改芟荷巾  
人情着處堪疏濶白首無聞獨此身

見石倉詩選

南屏報表

吳山對巖樓外路澗香興來渴野風乘月報餘

陰坐道堂靜鳥鳴春晝長呼童掃鶴徑看婦葺蠶房山

先生名奎字伯文號珠山起家刀筆閒以文無害稱絲  
布政使司吏再考從事錦衣錦衣者古所稱司隸校尉  
之職而領天子詔獄者也以游徼督察爲功而公故雅  
善詩頗跌宕自豪竊恥之聞比部郎李攀龍徐中行及  
山人謝榛輩爲詩社遊於是手所著詩謁之而諸君者  
且驚且訝相與招之入社其相唱和長安邸舍稍稍傾  
動諸公卿閒時陸太保炳掌錦衣亦雅聞公不敢以從  
事史遇之引爲上客太保公方藉世宗皇帝寵倚之彈  
射中外一切非常威棱所嚮閒或慘覈公時時從中關  
說太保亦時時解頤以聽而錦衣衛經歷沈公鍊者海

龍珠山房集附錄

一

內矯然文章忠義士也於是兩人深相結納共爲推挽  
未幾徐公學詩趙公錦吳公時來輩後先疏劾執政下  
詔獄公輒附耳太保及沈公鍊相與互爲擁護故諸君  
並逮繫廷杖獲免死而之以編民戍邊徼當是時中朝  
士大夫並推公與漢樓護晉郤超等其所最爲縉紳閒  
聲稱者處徐公學詩與沈公鍊事爲最故事詔旨爲民  
者例陞辭輒往戶部報名公從錦衣獄擁徐公行而謝  
山人榛亦尾而來追三人者相與歛歔嗚咽仰天畫地  
市衆愕然指曰若人也相君父子所讎次骨而甘心誓  
也彼二客何爲猶不畏虎齒牙閒哉及入戶部日已晡  
尚書令及諸曹以下並避去公猶厲聲曰徐公者天下

士聖天子已憐無他而赦之矣諸公輩反齟齬之耶謂國體何於是曹鄴從帷中聞之內愧趨出而徐公仍獲署名以去沈公鍊行且草封事以劾嵩父子諸不法舉酒屬公以後事公唯唯已而下獄嵩父子力搆寘之死公仍以身庇之如故諾尋亦未減田塞上於是時公之節俠傾中外而世蕃且欲中公以奇禍者屢矣公廼脫身去而太保深義公欲以州縣佐錄之公不以顧拂衣歸歸而探囊中裝無一錢獨尋舊所爲詩社遊者方太守公九敘童侍御公漢臣馬納言公三才朱寧州公孫炎陳太守公師沈太僕公淮沈鬱林公詔高光州公應冕趙溧陽公應元沈山人仕劉山人子伯及千戶侯施

龍珠山房集附錄

二

經輩相與後先投社翱翔湖山之閒最後予亦罷官歸閒過西湖諸社遊抑且併邀予詳見大雅堂碑中諸社遊數推予爲祭酒而予所最莫逆者公予一過西湖公輒一貰衣沽酒攜疊以從而其他或及或不及也未幾公之子志學第進士出令婺源有聲矣按婺源志志學字聖初嘉靖四十四年十一月任本縣知縣明年二月以礦賊衝縣謫福建漳浦典史婺源故無城坐礦盜論戍而公令次子某上書理其事于朝獲調漳浦尉公已垂白聞閩中多佳山水不厭兒之官固瑣俸固薄而獨喜武夷故仙人所嬉處於是岸幘肩瓢拄杖以遊選勝而歌所著有閩中稿徙寧陵徙貴溪公亦輒從之於退食暇問所平反外閒亦輒移其所故眺武夷者詩

歌之如初繇貴溪入爲都察院經歷公述嚮所爲社遊而吟者並星散園林臺榭半非故物已所至必嘯詠有遊燕稿久之葛孺人歿而公亦同其子扶柩來歸比服闋仍還舊職封公如其官尋改南京興司馬公復從之徧尋牛首燕磯鐘山石城暨六代蕪宮廢殿及我高皇帝所百戰而混一車書處公往往按牒而遊蒐勝以吟也所著又別有金陵稿久之輿司馬以病卒於官公哭之慟痛無以爲殮也爲詩題其像曰五十壽非夭大夫官不卑嗟夫公亦幸矣旣葬司馬君課諸孫絕不復問生產事家益凋落而公按故所社而吟者猶二三在也予閒同陳貞亭輩過之公猶巖歌霞矯不自己其歿也

龍珠山房集附錄

三

公不他屬屬諸孫請予題其墓且曰白雲繞前五山迎我我去矣又明日取筆硯書一炷秉元陽五字及作符若太極圖投之火又自臥榻爲詰曲作騎鶴狀而曰吾殆非死也第所謂尸解者也嗒然而瞑含殮之日顏色渥澤如平時肢體特輕按狀及諸孫所口述者如此嗟乎公生平嘗謂沖舉可致而刀圭可得也豈其驗耶諸孫又言公在錦衣所全活中朝之士被逮者數多而發源盜發時戈戟牆立徧田野邑之老穉數千人匍匐奔走不能避公獨口授令君藉壯丁爲兵餘並縱之鳥散去俄而賊火煙燄蔽天嚮非公之蚤發則數千人者燼滅矣豈天憐公而故遺之此耶享年八十有二諸孫長

庚輩卜以某月某日與葛孺人合葬于西湖某山之阡  
乞予題其墓按公所當天子之賜璽書而爵並不以書  
而第書之曰詩人李珠山先生墓者何蓋按公所自好  
固與日月俱遠也銘曰詩兮而蕭逸身兮而巖泉其生  
也纍纍乎蓬藿而赤紱不以挂其沒也翩翩乎蝴蝶而  
首邱不以憐百世之下過其墓宮者呼之爲騷客呼之  
爲列仙嗚呼朝猿兮樹吟夕鶴兮霜還其殆古之秦系  
賈島者流抑亦孫登白玉蟾之間予之書其墓也于斯  
年萬斯年

龍珠山房集附錄終

龍珠山房集附錄

湖

上編

游池沼歎且月

同信王同善



湖

嘉惠堂重雕



或云詩能窮人又云詩必窮而後工皆非也風騷以來  
材各天授彼所稱窮者特以之羈人寡婦遷臣逐客或  
能發爲幽眇淒泊之音以道其心之所至者耳詩豈必  
皆窮乎哉予讀友人李珠山公所爲閩中西湖諸什固  
不爲古人剴刻湛深之思亦絕不爲今人驕淫靡曼之  
辭其所當巖壑之勝雲煙之佳數與世之王公貴游名  
縉墨客浮沈倡和其間匠心所嚮鼓鑄不煩往往能以  
超逸之材清婉之藻夷曠之思清冽之響數與唐諸名  
家相爲翺翔大者孟浩然小者秦系不過也人或謂公  
貧杖頭錢數當乏絕卽所從遊賓客過之抑且櫟釜矣  
以予觀之公之志未嘗不翩翩自適也又烏在其爲以  
窮而工其予進士志學以予知公深屬予題之首簡予  
輒題而歸之者如此歸安茅坤序

湖上篇序

一

蘇軾之林靜觀之樂天觀之思南園之警煒與吾春不  
蘇墨客對沈沈其間五心沈沈其間五心沈沈其間五心  
不爲古人憐賤點點之思亦絕不爲今人驕淫靡曼之  
昔懷平姑于隨丈人李梨山亦絕爲關中西湖諸什固  
非獨爲幽眇淒泊之音以道其心之迥至吾耳昔豈不  
林谷夫對史也辨懷離於以之羈人寡婦遷臣逐客或  
延云精簡窮人又云精必窮而後工皆非也風騷以來

湖上篇

龍珠山人李奎著

幽居雜興二首

蔣詡開三徑於陵灌一園敢云玄豹隱聊避俗人喧山  
靜花初發江清鳥獨翻日斜漁牧散幽意共誰言  
一齋春已半高臥戶常關名恥無聞老身慚多病閒草  
藏通客徑雲送隔溪山向夕墟煙起沙邊白鳥還

中秋夜同豐吏部徐比部王虞部劉山人泛湖止

宿昭慶寺談空

泛舸晤良夜沿流止化城寒飈肅萬籟清露滴殘更大  
地山河入圓空水月明未能超法界徒自證虛名

湖上篇

桐江舟中

睡起復無事孤舟坐日西不知春水長漸覺遠山低斷  
岸疏花發危檣獨鳥棲蕭條巖子宅幾樹柳垂堤

孤山吟社四首

高人招結社小隱向湖心偶爾穿花出悠然到竹林青  
山供謝賦流水入嵇琴自得幽棲趣非關避世深  
岸迫鷗沙近林迴鶴徑長松風生羽扇山翠落衣裳避  
暑荷香細侵人竹色涼塵襟自可濯吟罷弄滄浪  
斜日下虛閣四山何寂寥因追大雅作寧爲小山招僧  
磬通宵徹漁燈隔浦遙不知巖桂發林外夜香飄  
昔賢遺選地我輩復幽棲泉石名猶在梅花路不迷雪

晴湖水漲天冷嶼雲低坐愛前峰好閒來更一躋

宿報恩寺

大利臨江左諸天鐘磬深千燈燃寶塔一水遶珠林地  
接天人境潮鳴梵海音自憐無定迹不住去來心

遊洞霄福地

萬疊盤雲入千迴遶湖行亂峰天外出斜日洞中明樹  
有重榮色禽多搗藥聲石田春雨過處處紫芝生

美女篇

東鄰有美女窈窕嬌且閒芙蓉刺短袖明珠絡雙環自  
持比玉心能保驚鴻顏許嫁里中兒遊俠滯幽燕結交  
李輕車十年征未還豈念閨中人鉛華易摧殘寒螿起

湖上篇

繡戶皎月窺梁閒默默不得語盈盈淚空彈豈無傾城  
姿良配誠獨難

東隣貧士篇

貧士守敝廬豈不慕輕肥短褐有寒色簞瓢常苦饑詎  
意狐白溫誰能念無衣落日下窮巷蓬蒿掩荆扉結駟  
西南來輕蓋若鴻飛朱袖照白日僮僕生光輝榮耀顧  
可羨義命安敢違子雲疲執戟伯夷飢採薇君子苟不  
固千秋孰是非

遊僊詩

朝陽離扶桑圓景生成池流光何倏忽感慨興悲思韋  
布豈足踐黼黻安足奇鼎食列高堂未若啜丹萸蟬蛻

不終晦舜華難再曠所以賢達人抱璞事無爲冥心覽  
八極神游駕雲螭高蹈躡紫霞蓬萊訪安期何用踵矩  
步跼促良可悲

南遊懷沈青門

路永歲且單江寒復迴折峭嶺入荒雲窮崖疑積雪惆  
悵一朝分參差千里別淹留隔歲期春草山中發物候  
有易遷情念無已歇懷彼山阿人獨持松桂節未遂清  
樽歡徒羨飛鴻翼

浮萍篇寄劉望陽

浮萍東西流聚散隨風轉昨日同君歡今朝異鄉縣矯  
矯高飛鷲冥冥北翔雁萬里附青雲寧忘途路倦君抱  
明月珠彩彩射流電豈無照乘光誰爲隋侯彈貴耳世  
所常安知魚目賤落日悲風淒淒歲將晏

立夏日病起卽事

別院茶香午睡清綠陰深處轉流鶯池邊雨過櫻桃熟  
梁上春歸燕壘成紈扇乍分湘竹製葛衣初試越絲輕  
青梅底事能消渴漫漫向文園慰馬卿

凌歊臺懷古

海門東望暮朝回白芷黃山遶吹臺春草不知歌舞歇  
寒江猶帶月明來荒林古寺幾人到故國繁花只自開  
複道離宮漫惆悵斷煙殘靄接蒼苔

過青山拜李翰林墓

白蓮亭上酒醒時已悔宮袍換接羅方朔漫隨金馬詔  
山公自愛習家池青山寂寞高人宇古墓荒涼太史碑  
獨有江南舊時月千秋還照草離離

遙憐楊柳媚芳時陌上堤邊細細垂謝女賦工風裏絮  
竇妻腸斷錦中絲眠餘翠黛憑誰盡舞劇纖腰不自支  
聞道征人隔榆塞莫將新調笛中吹

寒食客新安

殘雪初消水滿灘經年作客向新安披蘿自愛春衣潔  
禁火從教旅食寒傳舍草深仍病臥故園花發未歸看  
明朝被袂懷同社何處江舟有木蘭

湖上篇

鳳凰山弔古

鳳凰城邊春草生鴟夷江上晚潮平王圖霸業今安在  
越嶠吳山空復情漁浦煙光迷落日樟亭柳色暗啼鶯  
不堪故國花開處徙倚猶聞羯鼓聲

閩首寓姑熟道院

客依玄圃飯胡麻長日清香坐啜茶門掩松蘿巢水鶴  
樓開枕簟入煙霞巖前碧草皆云藥洞口紅雲半是花  
聞道吹笙能跨鶴何須句漏覓丹砂

黃雲陽詹雲門中秋過新安旅舍得暉字

中天月色淨暉暉北斗南箕望轉微桑落乍嘗田舍酒  
薜蘿初授旅人衣文星忽聚山中駕雲氣嘗屯竹裏扉

賦就銀河秋漏永滿庭梧葉夜鳥飛

七夕曲

閨闈西開轉七襄天河秋水夜微茫支機暫息千絲縷  
欹枕遙思八寶妝樓上月明烏鵲靜雲中露冷白榆涼  
深閨多少穿針婦獨宿誰憐關塞長

滄溟李觀察過湖社草堂得芳字

使君暇日過湖堂巖壑春回草樹芳賴有山花迎使節  
不教猿鶴避壺觴綈袍掩映青雲色綵筆爭傳白雪香  
何幸十年重再御得將衰朽接餘光

古栢行

虞山古栢幾千歲根盤節錯羅星文靈氣常懸白日雨

湖上篇

五

疏枝亂灑青天雲霜柯露幹了不識半是蒼苔半成石  
古鏡猶存翡翠光青萍未拭芙蓉色我來八月秋氣濃  
月明滿地蟠虬龍赤腳大叫不忍去長風吹落虞山鐘  
天生異物詎可測呵護常聞鬼神泣巖壑靈教無此材  
歲寒然後知松柏

新安寄施虎泉

君居富貴渚我棲新安邑江水日夜流無因寄消息目  
極黃山六六峰秋來朵朵開芙蓉思君可贈不可折愁  
倚烏聊三四松

陽春曲

三月江南春草芳水邊柳絲百尺長流鶯乍囀千金腹

紫燕雙棲文杏梁家家曲裏調鸚鵡處處簫聲引鳳凰  
鳳凰臺上花爭發翡翠樓前鳥並翔別有藍橋通蕙渚  
更憐斜狹接橫塘橫塘女兒多豔妝錦琴瑤瑟爲誰張  
能歌白雪畱人醉不管春陽斷客腸

無相寺

寶地入金沙珠林隱梵家龍飛來聽法鹿走去銜花八  
水開慈渡三乘演妙車煩囂信可滌長日對袈裟

宿慈湖

慈湖秋熟稻麥香酒醒天空月色涼鄰女隔窗歌白苧  
不知有客在他鄉

秋夢

湖上篇

六

白狼河北信音稀九月霜寒未授衣不耐離心向秋月  
卻憑飛夢到金微窮沙積裏歡難合羌笛聲中恨易歸  
若使涼風知妾意肯吹殘漏入重幃

送鄭山人歸四明

世事那堪問憐君已白頭艱難念兄弟慷慨動王侯白  
雪梁園賦悲歌易水流鑑湖茆屋在歸去有漁舟

昭君圖

朔雪胡雲萬里寒北風吹淚溼氈窳卻憐清禁蛾眉月  
猶向陰山馬上看  
鳳凰三茅道院同黃雲陽劉望陽看雪得迢字  
着屐窻辭山路遙山深日暝更迢迢梅花到臘爭先發

巖雪經旬尚未消寒靄隔江沈綠嶼凍雲低岸壓紅潮  
誰攀玉樹招黃鶴十二樓空聞洞簫

酬九疑朱宣州端陽前一日送酒資

五月江城雨閉門終日眠勞傳酒錢至正值端陽前已  
解囊中澁還堪杖底懸明朝看競渡猶得醉江邊

五月六日同青門沈山人望陽劉山人龍洲沈州  
守三洲沈僉憲集松里馬通政園亭得舟字

石邊花徑晚煙浮柳外斜陽映畫樓詞客吟成池草長  
美人歌罷棟雲流林中日月人皆醉竹裏風生暑自收  
共說端陽昨日勝渡頭猶繫競歸舟

夏日冉山王明府雙橋凌太守招集湖南吟社得  
湖上篇

魚字

七

雙鳧辭帝闕五馬入鄉閭結社臨湖曲開筵值夏初山  
圍四野翠水匝八窗虛谷鳥聲偏洽池荷葉正舒蘭調  
烹野蔌玉膾薦江魚酒向碁邊罰詩同竹上書醉歸湖  
路暝言笑雜樵漁

集朱九疑湖南吟社二首

草路入叢薄門前一水分悠然見山色況乃離人羣竹  
引遲遲日窗棲片片雲因君重詞賦常得過論文  
峻構臨湖港幽棲傍郭門竹藏中散地花覆辟疆園畫  
檻青山入澄波白鳥翻主人機久息日日對閑樽

長干行

五陵豪俠事輕肥日暮長干走馬歸秉燭夜過桃葉渡  
美人爭爲解羅衣

登采石憩蛾眉亭

長嘯思悠悠空亭悵獨遊蛾眉如春色牛渚截江流落  
日三山遠浮雲萬古愁騎驃人不見蘭杜滿芳洲

汪使君席上各賦一物余得香

都梁鳳腦博山鑪雲母屏開翡翠鋪百刻篆文銷漢漏  
九和煙縷貫隋珠暖雲片片凝瑤席沈水涓涓浸玉壺  
願使芬芳常不散春風夜夜入流蘇

同劉山人集高光州宅得廬字

隣巷接幽居邱園灌汲餘一樽常共集良夜肯交虛雨  
入鑪煙細花臨燭影疏城烏已催曙猶未返吾廬

湖上篇

八

獨酌

獨酌四無鄰雲霞自可親暫將千日酒聊寄百年身花  
發平林曉鶯啼選樹春長吟隨所適天地一閒人

避地

徑僻草萋萋花深路不迷曉煙楊柳拂春雨鷓鴣啼數  
口移家遠千峰入屋低門前有流水何異灑東西

入山

去去疑無地行行別有川亂山雲裏路絕壁洞中天見  
石還疑虎逢人恐是僊何須問煙火覓取晚霞煙

同顧山人宿三茅天繪樓聽雨不寐起閱道藏得

分字

江上千峰雨樓前萬壑雲獨憐仙館夜共臥石床聞入  
竹疏堪聽隨潮遠不分漏殘猶不寢起坐閱函文

天繪樓對月得圓字

樓迴地應偏天空月正圓珠疑神女弄鏡似玉臺懸素  
魄纔離海清光已入筵莫嫌仙院寂猶得伴嬋娟

聞鶯

紫陌春回啼早鶯綠窗聽處雨初晴遷喬未入宮中樹  
求友先聞谷口聲小院梨花春寂寂大堤楊柳曉盈盈  
莫教喚起遼西夢多少春闈枕上情

鹿門茅憲副席上詠鏡

湖上篇

九

寶鏡玉臺懸清輝滿室前蛾眉幸相許雉影詎須憐曲  
似菱開沼圓如月印天四窺如可照千里至神仙

宿山寺遇雨

古殿山深午未開竹房高臥欲忘回白雲亦解畱人住  
飛向山頭作雨來

寄與鹿周給事

僊掖春深黃鳥飛聖朝無事諫書稀遙憐退食還青瑣  
誰共長吟向紫微禁月每隨清夜直鑪煙偏傍近臣衣  
雲霄不謂蓬蒿遠常遣書來問釣磯

雪中過新嶺

雪深蹊路險况復萬山中盤嶺磨蟻上懸崖策馬通東

雲沾樹白寒火隔林紅折得梅花去前村醉晚風

蘇堤踏歌行

湖邊女兒嬌且妍三三兩兩踏花前笑持團扇半遮面  
不唱陽春歌採蓮採蓮聲斷無人續日暮湖南望湖北  
腸斷春風十二橋滿路鶯啼草新綠

同劉顧二山人宿淨慈寺

初地昏猶到諸天晚更躋微風生杖底片雨過湖西鐘  
磬雲中出星河檻外低欲消塵世念須信宿招提

賦得我愛夏日長

入夏懶巾櫛養痾翳喬林修景入南陸炎雲出東岑涼  
風池上至習習吹我襟偃臥日當午高松落繁陰隆燧

湖上篇

十

既已闕綠醕從飲斟何以消永晝匣中有鳴琴勿謂聽  
者稀山水皆知音

同松里青門望陽南宮泛舟入藕花居

出郭已忘俗入山何必深池波搖塔影藤蔓覆牆陰香  
滿蓮花界涼生祗樹林淹畱坐長日吟賞滌煩襟

送包鹿池北上和東沙翁韻

江上逢君晚舟前別去難慚無言可贈聊藉酒爲歡白  
雨鄉山暮青雲客路寒翻飛奮鵬翮努力幸加餐

西湖採蓴

興來忽憶雉尊生春水西湖二月平十里桃花開正豔  
一舟蓮葉蕩偏輕冰絲翠帶波中裊玉液金莖掌上明

盎裏挈歸香滿室吟餐不讓大官羹

雨中登寶石山閣得閒字

境出人天外樓開煙霧閒數峰寒帶雨疊浪遠搖山僧  
磬雲中出漁歌樹杪還坐看湖色暝心與水俱閒

春日同劉望陽顧南宮集連上人山房得妍字

與客登虛閣徘徊春日妍晴雲標塔影空翠墮山煙一  
水窗中綠千花象外燃浮杯如可渡且莫學逃禪

泛湖入飛來峰越靈隱寺澗西山房尋李响嘯一

首

夙心厭紛囂遁迹託幽勝欣茲湖上山乃悅平生性噴  
帆多奇峰雜沓有靈境弱蔓倦可攀幽泉靜堪聽白石  
擁巖阿立崖削梯磴悄悄嘯夜猿迢迢度雲磬既就鹿  
苑期復尋鷲嶺徑林卉晏自榮樹鳥棲未定潮音海上  
聞月色松閒暝寤言槃澗人玩世何獨醒

塘棲舟中與莫寒泉別

水上同君話迢迢夜不眠慙慙戀洲渚寂寞坐寒煙別  
路青山外離心綠酒邊孤舟何處去兩地各悽然

秋夜宿虎跑山中與顧山人別

窈窕畱深谷蕭條臥一樓聞鐘驚客夢對月起離愁河  
影澹秋色江聲急夜流不堪仍遠別千里一孤舟

